

說

文

蠡

箋

周禮八歲入小學保氏教國子以六書漢尉律學僮十七已上試諷籀書九千字乃得爲吏又以八體試之郡移太史并課最者以爲尙書史書或不正輒舉効之汝南許君病世學者詭更正文翫其所習蔽於希聞采史籀李斯揚雄之書博訪通人作說文解字十四篇自漢以後堙替不行中更唐宋李陽冰徐鼎臣兄弟先後振興而篆楷旣殊習之者寡濡豪之家但求便俗漸失本原且傳寫則亥豕之或昧其形授受則豬都之難諧其聲以至酢醕混讀種種易解胄胄通用許繇莫分耐能伯霸昔別今淆西樓瀾漣古

同時異六經諸史恒苦難通矣夫字有正義有通義有正讀有通讀山居豐暇因取許氏一書考其古文通用與夫許氏不載徐氏附入審非漏落者並援古以證之仰鑽經傳旁搜史子金石諸記罔不箋掇雖竭蠡測之勤難解挂一之誚冀於覽古或有少助至若籀文奇字見於重文者甚多貴援古以證今非鄙近而好異且許氏自有全書不復具錄云

乾隆四十六年歲次辛丑四月朔吳郡潘奕雋識

說文蠡箋

第一

一部

一惟初太始道立於一造分天地化成萬物

古文

儀禮士冠禮壹揖壹讓注古文壹作一周禮典命  
其士壹命公羊襄二十九年不壹而足是一壹通  
𠄎大也从一不聲

不類篇或从十作𠄎石經尙書殘碑𠄎𠄎其左昭  
三年譏鼎之銘曰昧旦𠄎顯杜氏曰𠄎大也書作

丕顯是丕亦作𠂔又書無逸乃諺既誕不則侮厥  
父母漢石經不作𠂔是𠂔通不

上部

一高也此古文上指事也𠂔上篆文

鄉射禮上握焉注今文上作尙觀禮尙左注古文  
尙爲上是上尙通

示部

二示天垂象見吉凶所以示人也从二二古文上字  
三垂日月星也觀乎天文以察時變示神事也

古文

詩視民不佻鄭箋視古示字曲禮常視毋誑注視  
今之示字士昏禮視之矜聲注視乃正字今文作  
示是視示通也又易寘於叢棘范甯引作示於叢  
棘又詩鹿鳴示我周行鄭箋示當作寘又鄭注中  
唐示讀如寘諸河干之寘是示寘又通

祥福也从示羊聲

公羊昭十一年盟於侵羊疏曰穀梁作履祥元嘉  
刀銘宜侯王大吉羊按羊部羊祥也是祥羊通又  
春秋成公十六年左氏傳德形詳義禮信正義曰  
詳祥也古字同易履視履考祥釋文本又作詳大

壯不能退不能遂不詳也王肅鄭元俱作祥書呂  
刑告爾祥刑後漢劉愷引作詳刑君爽其終出於  
不祥蔡邕石經作出於不詳是古祥通作詳省作  
莘

祔祭主贊詞者从示从人口一曰从兌省易曰兌  
爲口爲巫

詩侯作侯祝傳作祝詛也釋文祝周救反穀梁祝  
吁左氏公羊作州吁是祝有二音有州音故與州  
文通也今訓詁者作咒經典所無又詩干旄素絲  
祝之箋曰祝當作屬屬著也周禮瘍醫職祝藥劑

殺之齊注云祝當爲注淮南子治工之鑄器高誘  
曰鑄讀作祝禮記封帝堯之後于祝注云祝或爲  
鑄蓋古者祝屬鑄注音同故俱通張平子西京賦  
東海黃公赤刀越祝李善注音咒蓋古人以祝咒  
通用猶以亂爲治以攘爲讓反覆見義爾

禩 灌祭也从示果聲

周禮大宗伯攝而載果注果讀爲禩大行人壹禩  
注故書禩作果鄭司農云禩讀爲灌考工記禩圭  
尺有二寸注禩之言灌也或作禩或作果又周語  
王禩鬯饗醴韋昭曰禩灌也灌鬯飲醴皆所以自

香絜是禋正字省作果通作渠灌

禋宗廟奏祓樂从示戒聲

周禮鐘師祓夏注杜子春祓讀爲陔又小雅湛露箋謂陔節也陸德明釋文陔亦作祓是祓陔通

禋除服祭也从示覃聲

儀禮士虞禮中月而禋注中猶間也禋祭名與大祥間一月凡二十七月禋之言澹澹然平安意也古文禋或爲導又谷部𠂔舌兒重文作𠂔許叔重曰讀若三年導服之導是禋導通

王部

自王大也从自自始也始皇者三皇大君也自讀若鼻今俗以始生子爲鼻子

荀子方皇周挾楊倞曰方皇讀爲彷徨又孟子皇皇如也又新附遑徐鼎臣曰經典作皇是古人遑遑止作皇又觚觥作餘皇遑觥俱新附字

王部

𤣥 璧也肉好若一謂之環从玉𤣥聲

儀禮布巾環幅不鑿注古文環作還春秋哀三年傳道還公宮又諸侯之師還鄭而南漢食貨志還廬樹桑是古環還通

琺 珊瑚也从玉胡聲

春秋左氏傳哀十一年仲尼曰胡簋之事則嘗學之矣杜曰胡簋禮器名夏曰胡周曰簋今作瑚借字

玨部

玨 分瑞玉从玨从刀

周禮太宰匪頒鄭司農曰頒讀如班布之班司士羣臣之版注故書版作班王制名山大澤不以盼注盼讀爲班士虞禮以其班附注古文班爲辨或爲胖是班與頒版盼辨胖皆通

士部

士事也數始於一終於十从一从十孔子曰推十  
合一爲士

書呂刑有邦有土今史記土作士周禮其附於刑  
者歸於士注士謂主斷刑之官或謂歸於圉土鄭  
以古土字有作士者故復以圉土釋之詩保有厥  
士義作土周牧敦亦以士爲土又漢禮器碑於是  
四方土仁以土爲士以仁爲人是士與土音義判  
文通士與事文判義通書洛誥見士于周正義曰  
士事也

一 部

中 和也从口 一 上下通

詩中心藏之古文孝經引作忠心漢張遷碑中謩於朝呂君碑以中再顯名義均應作忠是中忠通

中 部

𠂔 難也象艸木之初生屯然而難从中貫一一地也尾曲易曰屯剛柔始交而難生

詩白茅純束箋云純讀如屯戰國策錦繡千純高誘曰純音屯左氏傳執孫蒯於純留漢書作屯留是屯與純通又周禮鄉師巡其前後之屯注屯故

書作臀又楊雄甘泉賦敦萬騎於中營今李善曰敦與屯同是屯又與臀敦通

𤇗火煙上出也从巾从黑熏象也

後漢趙壹傳言談至熏夕是𤇗古作熏又周禮鬯人鬯鬯女巫𤇗浴鬯讀如熏齊語三鬯三沐韋昭云鬯或爲熏漢書豫讓鬯面吞炭顏師古曰鬯熏也是熏鬯通

艸部

壯

𠂔古文

女部妝飾也史記司馬相如傳覲莊刻飾後漢書

明帝紀注漢官儀具鹽陳莊具是妝正字莊通字  
裝俗字

𦰩 𦰩大苦苓也从艸古聲

荀子王制篇辨功苦注功謂器之精好者苦謂濫  
惡者齊語辨其功苦韋昭曰功堅也苦脆也此皆  
謂苦卽鹽也鹽不堅固也士虞禮釧毛用苦鄭注  
苦苦茶也古文苦爲枯是苦枯通字

𦰪 𦰪蒺藜也从艸齊聲詩曰牆有𦰪

楚詞蒺藜施以盈室兮王逸注三者皆惡艸蒺藜  
藜也詩楚楚者蒺洪慶善曰今詩蒺作茨吳仁傑

離騷艸木疏曰字書蕢蕢黎詩作茨說文作薺按  
說文蕢艸多貌茨以茅葦蓋屋是薺正字蕢茨借  
字

荷 芙蕖葉从艸何聲

詩關雎序哀刑法之苛釋文苛本亦作荷左傳苛  
愿不作釋文苛本亦作荷漢書酈食其傳好持荷  
禮師古曰荷與苛同又周禮宮正幾其出入注謂  
幾阿釋文阿作荷又閤人注苛其出入注阿問又  
易大畜何天之衢何梁武帝作荷又靈光賦荷天  
衢以元亨是苛阿字可通作荷何檐字亦可通作

荷

𦰩 艸芽也从艸明聲

史記周本紀以振貧窮萌隸樂毅傳施及乎萌隸  
是萌與氓通

𦰪 大苦也从艸需聲

爾疋𦰪大苦注今甘艸也詩唐風采苓采苓首陽  
之巔傳苓大苦也𦰪苓字異音義同又吳仁傑離  
騷艸木疏曰微霜降而下淪兮悼芳艸之先𦰪王  
逸作零云古本作𦰪按雨部需零也詩零雨本又  
作霈雨又石鼓庚部霈雨奔流霈與霥通故𦰪又

與零通雨露曰霑花落曰藎也

𦰩田艸茂也从艸番聲

經典通用爲藩屏字詩四國於蕃書以蕃王室又周禮九州之外謂之蕃國是也又書洪範庶艸蕃廡古文尙書作番廡又白石神君碑永永番昌是藩蕃通字番省字

𦰩艸兒从艸卒聲讀若瘁

荀子富國篇勞苦頓萃注萃與頓同又詩盡瘁以仕本又作萃是萃頓瘁通

𦰩田不耕田也从艸畝易曰不畝畝田或省艸

漢書地理志惟留其道又臨淄作臨留是淄古作

留

芾道多艸不可行从艸弗聲

詩朱芾斯皇釋文芾又作芾或作韍按說文市重文作韍是芾市韍通

蕭艸也从艸爲聲

左襄二十五年楚蔣掩爲司馬杜云蔣子馮之子

徐鼎臣作遠子馮是蔣正字遠新附字

蕉生泉也从艸焦聲

左成公九年無棄蕉萃是蕉顛通

茶茶苦茶也从艸余聲同都切徐鼎臣曰此卽今之茶字

釋文爾正釋艸注茶音徒說文同詩云誰謂荼苦月令孟夏之月苦菜秀本艸云苦菜亦名茶艸今處處有之陶宏景乃疑是茗失之矣釋木篇有檟苦茶乃是茗是鼎臣所謂卽今茶字者也又玉藻前詘後茶鄭司農云茶讀爲舒遲之舒周禮考工記斲目必茶鄭司農云茶讀爲舒舒徐也又弓人寬緩以茶注茶古文舒假借字易來徐徐子夏作來茶茶詩荆舒是徵史記年表引作荆茶左傳陳

乞弒其君茶公羊作舍史記律書云舍者日月所  
舍舍者舒氣也是茶與舒舍徐音義俱通

艸田器从艸條省聲論語曰以杖荷篠今作蓀  
書篠蕩竹部作筱亦从條省

全芥脆也从艸全聲

吳仁傑離騷艸木疏曰荃不察余之中情兮王逸  
注荃香艸諭君也洪慶善曰荃與蓀同莊子得魚  
忘荃崔音孫云香艸可以餌魚九歌蓀櫓蓀壁皆  
作荃又丁度集韻荃又作蓀荃古字蓀新附字也  
艸田艸生於田者从艸从田

詩有貓有虎釋文本作苗又虎部虎竊毛謂之號  
苗是古者貓亦作苗貓新附字

𧇖部

𧇖

日且冥也从日在𧇖中

經典日冥俱从莫又詩聖人莫之傳莫謀也釋文  
又作漠一作謨按爾疋漠謨同訓謀又詩貆其德  
音韓詩貆作莫是莫漠謨通字貆借字

說文叢箋

第一

廿

說文蠡箋

吳郡潘奕雋述

第二

八部

詹多言也从言从八从𠂔徐鼎臣曰𠂔高也八分也多故可分也

左傳鄭詹公羊作鄭瞻又魯頌魯邦所詹史記周本紀顧詹有河是詹瞻通

介畫也从八从人人各有介

書秦誓一个臣馬本作介今作个公羊文十二年引作一介釋文古拜反尙書音古賀反是介有二

音徐氏新修字義云明堂左右个當作介是古止  
作介後人因篆文作𠂔易篆而楷遂誤作个耳  
𠂔語之舒也从八舍省聲

周禮地官委人凡其余聚以待頒賜吳仲山碑久  
有余財是余與餘通

采

𠂔 辨別也象獸指爪分別也讀若辨

書堯典平章百姓鄭康成作辨章又平秩東作周  
禮鄭注引作辨秩史記引作便程書洪範王道平  
平史記張釋之馮唐傳贊引作便便今亦讀作便

便詩采菽平平左右韓詩作便便今亦讀作便蓋  
采篆作𦰩古文作𦰪平篆作𦰫古文作采形體易  
混遂以采訛平耳其或作便或作辯者古人三字  
皆通也論語便言亦訓爲辯

𦰪 詳盡也从心从采

說文虫部𧈧𧈧𧈧也是古人𧈧𧈧字正作𧈧𧈧新  
附字

釋 解也从采采取其分別物也从畢聲

詩靜女說懌女美鄭康成曰說懌當作說釋詩那  
亦不夷釋釋文又作懌頰弁庶幾說懌釋文本又

作釋又言部說說釋也是古人訓說者正作釋通  
作釋憚新附字又漢景君碑農夫醱耒史記亦多  
假醱爲釋是又與醱通

牛部

𠩺 易曰𠩺牛乘馬从牛荀聲

今易作服牛又左傳伯服史記作伯𠩺是服𠩺通  
犧宗廟之牲也从牛義聲賈侍中說此非古字  
秦詛楚文圭玉義牲是古犧止作義

𠩺 牛鳴也从牛象其聲气从口出

荀子非相篇堯舜參牟子注牟與眸同又本部盲

字叔重曰目無牟子又新附眸字徐氏曰說文直作牟是古正作牟

口部

𠵽 口有所銜也从口兼聲

易謙卦一作𠵽又漢司馬相如傳陛下𠵽讓而弗發是謙通作𠵽

𠵽 聶語也从口从耳詩聶聶幡幡

詩緝緝翩翩是聶正字緝通字又捷捷幡幡是又通作捷

𠵽 咽也从口益聲𠵽 籀文𠵽上象口下象頸



𠵿 大言也从口庚聲

始皇本紀過丹陽至錢唐唐不从土塘新附字

叩部

𠵿 譁訟也从叩𠵿聲

𠵿 今作𠵿又作𠵿周禮𠵿夢杜子春𠵿當爲驚愕之愕

走部

𠵿 趨也从走𠵿省聲徐鼎臣曰春秋傳𠵿告用此字今俗作𠵿非是

檀弓父兄命𠵿者周語𠵿者未及經典俱從𠵿

止部

歸 女嫁也从止从婦省自聲

聘禮歸饗氣注今文歸爲饋論語詠而歸鄭康成  
本作饋又左傳歸公乘馬論語歸孔子豚齊人歸  
女樂皆以歸爲饋又儀禮士虞禮特豕饋食鄭注  
饋猶歸也又以饋爲歸是饋歸古互通

正部

正 是也从止一以止 𠄎 古文正从二二古上字  
𠄎 古文正从一足足者亦止也

周禮小宰政役注凡其字或作政或作正或作征

竝通

是部

𠄎 直也从日正 𠄎 籀文是从古文正

覲禮太史是右注古文是爲氏曲禮五官之長曰  
伯是職方注是或爲氏古者是氏同字易禋既平  
康成作祗既平是氏通故禋祗亦通

辵部

𨔵 就也从辵告聲譚長說造上士也 𨔵 古文造

从舟

詩造舟爲梁毛云天子造舟方言云浮梁也廣雅

作船又膳人職王卒食以樂徹於造大祝職二曰  
造注故書造作竈杜子春讀竈爲造吳越春秋勒  
馬銜枚出火於造閭行而進是造竈通

遯

遇也从辵萇聲

經典釋文詩蔓艸章遯逅作遯遘綢繆章遯逅作  
解觀是遯止作解遘或作觀遯逅皆新字也

速

疾也从辵束聲遯籀文从𠂔𠂔古文从𠂔

从言

曾子問遲數註數讀爲速特性饋食禮乃宿尸注  
宿或作速又玉藻見所尊者齊遯是宿速數通字

邀重字

連員連也从辵从車

武梁祠堂畫象老萊子事親至孝衣服斑連隸釋云以斑連爲斑斕又淮南子至於連石是爲下春高誘注連音瀾古人讀書連皆若關故與瀾通而瀾瀾爲一字又孔廟禮器碑以胡輦爲胡連易蹇六四曰往蹇來連虞翻曰連輦也周禮鄉師輦輦注故書輦作連先鄭連讀爲輦管子輦皆作連是又與輦通也

隸唐逮及也从辵隸聲

詩威儀棣棣釋文一作逮逮又左傳及禮記孔子  
閑居俱引作逮逮又詩唐棣韓詩作唐逮是棣逮  
通

逖從行難也从辵聲易曰以往逖

易逖今本作吝又漢地理志民以貪逖師古曰逖  
與吝同又王莽傳性實逖嗇是逖吝通

逖從斂聚也从辵求聲虞書曰旁逖羸功又曰怨匹

曰逖

逖書今作鳩是逖鳩通又詩君子好逖箋作仇韓  
詩亦作仇左傳怨偶曰仇是仇逖通

辟 同也从是辟聲

周禮掌交使咸知王之所好惡辟行之注辟讀如辟忌之辟使皆知王之所好者而行之知王所惡者辟而不爲又書金縢我之弗辟傳云辟法也馬鄭引音避謂避居東都是古避省作辟

迂 避也从辵于聲

禮文王世子于其身以善其君古人迂于通

逵 所行道也从辵从省一達謂之道

左傳襄公五年會吳於善道公羊穀梁道作稻喪大記禪而內無哭注禪或作道稻道聲之同道禪

聲之轉

彳部

𢓐 至也从彳段聲

漢書禮樂志假狄合處師古假卽遐字其字从彳  
今檢漢碑隸書亦止作假又詩衛風不瑕有害鄭  
注瑕遠也是古以假爲正字通作瑕遐新附字也

行部

𢓐 邑中道也从行朮聲

詩邶風報我不述釋文述本亦作術儀禮士喪禮  
筮人許諾不述命鄭注古文述皆作術又韓勅後

後碑山導音故碑與  
此亦通

碑其術韓君德政是古人術述俱通用又禮月令  
審端徑術讀若夫問有遂之遂學記術有序鄭云  
術當爲遂春秋西乞術公羊作西乞遂是術遂亦  
通

𨔵 行兒从行吾聲

周禮田僕注術還之使不出圍釋文術又作禦同  
釋名術止也北海相景君銘強術改節隸釋云以  
術爲禦是術禦音義俱同又春秋公羊傳彭術一  
作彭牙是又與牙通

足部

躋

登也从足齊聲商書曰告子顛躋

禮地氣上齊注齊讀爲躋詩至於湯躋孔子閑居引作齊齊躋通

距

雞距也从足巨聲

石經論語其不可者距之今論語作拒又春秋左傳僖三十四年晉師軍于廬柳杜預曰懷公遣師距重耳是古拒正作距說文有距字無拒字

蹇

跛也从足寒省聲徐鼎臣曰易王臣蹇蹇今俗

作蹇

張遷碑中蹇於朝是以蹇作蹇自漢已然是蹇蹇

通

𧾷

瘃足也从足困聲

徐鍇曰足遇寒裂曰瘃漢書天寒士卒皸瘃皸當  
作𧾷皸新附字

卷之八

七

七

說文蠡箋

吳郡潘奕雋述

第三

𠂔部

𠂔 呼也从𠂔莧聲讀若謹

玉篇云與喚同

句部

𠂔 止也从句从手句亦聲

周禮巾車金路鉤注故書鉤作拘杜子春讀爲鉤  
禮以袂拘而退是鉤拘通詩敦弓旣句句省字

古部

𦣻 大遠也从古段聲

士冠禮孝友來格注今文格爲𦣻少牢饋食禮𦣻  
于主人注古文𦣻爲格是𦣻格通

言部

讎 猶讐也从言讎聲

漢高帝紀讎數倍宣帝紀每買餅所从買家輒大  
讎又郊祀志五利妄言見其師其方盡多不讎是  
讎正字售新附字

詳 審議也从言羊聲

吳仲山碑出入敖詳是詳通翔楚詞天問箕子詳

詩詒我佩玖貝部新附有貽字徐鼎臣曰經典作詒是詒正字

**詒** 辭去也从言舛聲

春秋左傳宣公十六年成周宣謝火釋文本又作榭荀子王伯篇臺謝甚高注謝與榭同秦誓惟宮室臺榭釋文云榭本又作謝又左氏宣榭古文作射是榭正作謝省作射榭新附字

**識** 常也一曰知也从言戠聲

周禮祭之日表齊盛告絜注故書表爲剽剽表皆謂徽識也又春秋傳昭二十一年揚徽者公徒也

注徽識也釋文識亦作幟詩織文注織微識也漢書陳湯傳見單于城上立五采幡織師古曰織讀曰幟是古止用識通作織幟新附字也又論語賢者識其大者蔡邕石經作志多見而識之白虎通引作志又左傳以志吾過周禮辨方正位鄭康成謂考工匠人建國水地以縣置槷以縣視以景爲規識日出之景與日入之景蓋古文字少記識之識與知識之識志意之志皆通誌則新附字也周禮職方氏樊毅修華嶽碑作識方氏歐陽永叔曰識字字畫分明非訛是古職亦通作識

音部

竟

樂曲盡爲竟从音从人

禮記入竟而問禁經典境作竟是竟正字境新附字

辛部

童

男有皐曰奴奴曰童女曰妾从辛重省聲

易童牛之告作童牛部新附作犝曰無角牛也徐鼎臣曰古通用犝是童正字犝通字犝新附字

升部

承

承也从手从升丰聲

曲禮則兩手奉長者之手是捧古作奉又漢書俸  
祿字俱作奉

共部

𡗗 同也从廿升 𡗗 古文共

詩受小共大共鄭康成曰小共大共猶所執搢大  
球小球也是珙古作共珙新附字

昇部

𡗗 升高也从昇𠂔聲 𡗗 𡗗 或从𠂔 𡗗 古文𡗗

漢郊祀志欲惡夏社師古曰惡古遷字是舉遷通

革部

革獸皮治去其毛革更之象革古文革从三十

三十年爲一世而道更也

方言憾鰓乾都耆革老也三國志彭萊傳老革荒  
悖可復道耶裴松之引方言爲注是革有老義又  
詩匪棘其欲禮記引作匪革是革棘音通也

鞶革大帶也易曰或錫之鞶帶男子帶鞶婦人帶絲  
从革般聲

周禮巾車樊纓注樊讀如鞶帶之鞶鞶樊古聲通  
鬲部

鬲炊氣上出也从鬲壘省聲鬲籀文融不省



字之厯存者今則但有煮字而𦉰𦉰字已廢矣  
𦉰熬也从𦉰𦉰聲徐鼎臣曰今俗作𦉰別作炒  
方言𦉰火乾也秦晉之間謂之𦉰

𦉰部

𦉰種也从𦉰𦉰持而種之詩曰我𦉰黍稷徐鍇曰  
𦉰土也

周禮或審曲面𦉰以飭五材凡勢俱作𦉰勢新附  
字

又部

𦉰手也象形三指者手之𦉰多略不過三也

考工記有三均注有讀爲又是又有通王制王三  
又注又當作宥是又通宥

𠂔 滑也詩云𠂔兮達兮从又中一曰取也

今詩𠂔作挑

史部

𠂔 職也从史之省聲𠂔古文事

書見士於周詩勿士行枚皆以士爲事是事士通  
又詩武王豈不仕傳仕事也是又與仕通

聿部

𠂔 持事振敬也从聿在鼎上戰戰兢兢也𠂔古文

文肅从心从月

祭統宮宰宿夫人注宿讀爲肅古人宿肅羞速俱通

𠂔部

𠂔

堅也从又臣聲讀若鏗鏘之鏗古人以爲賢字

公羊成公四年鄭伯𠂔卒疏左傳作堅穀梁作賢今本穀梁亦作堅又漢校官碑親𠂔寶甯是堅賢俱省作𠂔

臣部

臧

善也从臣𠂔聲臧籀文臧

漢書禮樂志臧於禮官師古曰古書懷藏之字皆作臧又武班碑勲臧王府藏新附字

殳部

殳 相雜錯也从殳殳聲

詩又有嘉肴本又作殳是肴正字殳借字

寸部

寸 十分也人手卻一寸動脈謂之寸口从又从一  
詩予忖度之釋文本又作寸又玉藻瓜祭上環注  
上環頭忖也釋文忖本又作刂是古正作寸通作  
刂忖新附字

𦉰 六寸簿也从寸𦉰聲一曰專紡專

詩有敦瓜苦傳敦猶專專也箋專專如瓜之繫綴  
焉釋文專徒端反又行葦敦彼行葦傳敦聚貌是  
敦與團專並通又詩載弄之瓦傳瓦紡塼也釋文  
塼本亦作專是古塼作專說文無塼字

攴部

攴 通也从攴从攴从育

周禮考工記徹廣六尺又詩徹我牆屋是古者徹  
撤正作徹

𦉰 汲汲也从攴子聲周書曰孜孜無怠

咎繇謨思曰孜孜史記作孳孳古通

敵 仇也从支音聲

史記田單傳始如處女適人開戶後如脫兔適不及距是敵與適通又論語無適也鄭康成作無敵

𢦏

彊取也周書曰𢦏攘矯虔从支兌聲

今書作奪衛包所改也奞部作奞手持佳失之也从又从佳漢後多假奪爲𢦏

𢦏

怒也詆也一日誰何也从支臺聲

皋陶謨惇敘九族史記作𢦏敘禹貢惇物史記作敦物詩行葦序敦史受之禮內則皆有惇史是敦

惇通詩鋪敦淮瀆箋敦當作屯是敦屯通又詩追  
琢其章追讀爲敦又敦琢其旅釋文徐音彫疏釋  
器云玉謂之彫敦彫古今字又詩行葦敦弓旣堅  
傳天子敦弓定公四年公羊傳何休云天子彫弓  
是敦又通彫

敦 敔也从支專聲周書曰用敔遺後人

舜典敬敷五教古文尙書作敬傳漢文帝紀傳納  
以言師古曰傳讀曰敷是傳敷通

卜部

占 卜問也从卜貝以爲贄一曰鼎省聲京房所說

周禮大卜凡國大貞鄭司農注貞問也又國大遷則貞龜是古止作貞偵新附字

叶卜以問疑也从口卜讀與稽同書云卜疑今書作稽通字

用部

𠄎用也从用从庚庚更事也易曰先庚三日漢書傭工之傭俱作庸省字也

說文蠡箋

吳郡潘奕雋述

第四

目部

眇 目少精也从目毛聲虞書耄字从此

漢書眊悼从此是眊耄通


眊 目相戲也从目晏聲詩曰睎婉之求

今詩作燕通字

眇 一目小也从目从少少亦聲

易妙萬物而爲言王肅董遇本俱作眇又史記戶說以眇論又漢元帝贊窮極幼眇師古曰幼眇讀

曰要眇又楚詞九歌湘君美要眇兮宜修亦作眇  
古無妙字也

開闔目數搖也从目寅聲徐鼎臣曰今俗別作  
瞬

莊子庚桑楚終日視而目不瞬今本猶作瞬是古  
字之厘存者

睂部

目上毛也从目象睂之形上象額理也

儀禮士冠禮睂壽萬年注古文睂作麤漢書王莽  
傳赤麤聞之師古曰麤睂也又漢北海相景君銘

不永麋壽是古睂麋通

盾部

𡗗 盾也从盾戈聲扶發切

詩蒙伐有苑釋文伐本亦作𡗗𡗗正字伐借字也

鼻部

𦘒 以鼻就臭也从鼻从臭臭亦聲

玉篇引論語三𦘒而作又漢書敘傳班嗣報桓譚  
書不結聖人之罔不𦘒驕主之餌師古曰𦘒古嗅  
字是嗅古正作𦘒

羽部

翬 鳥之彊羽猛者从羽是聲

周禮有翬氏鄭司農云讀爲翹翼之翹是翬翹通

翬 翼也从羽支聲

今作翹易左而右同

翬 山雉尾長者从羽从佳

周禮屈狄掄狄注狄當作翟左傳翟泉公羊作狄  
泉長狄國語作長翟是狄翟通

翬 王樂舞以羽翬自翬其首以祀星辰也从羽王聲  
讀若皇

周禮舞師有皇舞注皇書或爲翬翬正字皇通字

佳部

𪗇 鳥之短尾總名也象形

詩翩翩者騅釋文本又作佳鳥部騅祝鳩也是騅

佳通

雅 楚鳥也一名鷯一名卑居秦謂之雅从佳牙聲

徐鼎臣曰今俗別作鴉

書君牙禮記引作君雅牙雅之省

𪗇 周燕也从佳少象其冠也肉聲一曰蜀王望帝

姪其相妻慙亡去化爲子𪗇鳥故蜀人聞子𪗇

鳴皆起云望帝

曲禮立視五鵠注鵠猶規也今子鵠作子規是鵠規互通

**離**黃倉庚也鳴則蠶生从隹离聲

詩斯干無父母貽羅釋文羅本又作離兔爰逢此百羅釋文本又作離又書不羅於咎史記引作不離於咎又左氏襄公二十一年人謂叔向曰子離於咎是離正字羅新附字也又左氏昭十三年乃藩爲軍杜氏曰藩離也陸德明曰假借字是古籀亦作離

**隹**依人小鳥也从小佳讀與爵同

**𪚩** 雛鰥也。从佳，邕聲。

雉有十四種盧諸雉喬雉鳴雉鷺雉秩秩海雉翟

矢聲𨾏古文雉从弟

התורה והנבואה

雄賦辛夷作辛雉服虔曰雉夷聲相近今按古文雉作𪔐當是𪔐之省作弟遂訛弟爲夷耳

隹部

𪔐 小爵也从隹叩聲詩曰隹鳴於垤

詩鵲鳴於垤箋鵲水鳥釋文鵲本又作隹知古者正作隹

苜部

苜 勞目無精也从苜人勞則蔑然从戌

易剝蔑荀爽作剝滅滅蔑通


羊部

美甘也从羊从大羊在六畜主給膳也美與善同

意徐鼎臣曰羊大則美故從大

周禮美惡字作嫩嫩美古今字

鳥部

 鵲鵲也从鳥舟聲

詩宛彼鳴鳩傳鳴鳩鵲鵲字林作鵲鵲蓋周舟通

故鵲鵲通也


 鵲鵲也从鳥盧聲

 鵲鵲也从鳥渠聲

 鳥也从鳥庸聲

漢書司馬相如傳盧渠庸字皆不从鳥省字也

鳥部

 孝鳥也象形孔子曰烏𦣻呼也取其助氣故以爲鳥呼凡鳥之屬皆从鳥徐鼎臣曰今俗作鳴

 古文鳥象形  象古文鳥省

今文作於詩於昭于天於乎小子是鳥於一字又於越讀若于又於部于於也是於于通字

幺部

 微也殆也从幺戌戌兵守也幺而兵守者危也荀子王制篇關市幾而不征注幾阿察也禮記幾

作譏是譏幾通

專部

惠也从心从叀徐鍇曰爲惠者心專也

文惠从艸

莊子逍遙游惠蛄不知春秋从惠或作𧈧新附字也今之蕙卽𧈧字

受部

𧈧引也从受从于籀文以爲車轅字

左傳盟於袁婁穀梁作爰婁又轅濤塗亦作袁濤塗爰田國語作轅田漢爰盎一作袁盎是爰袁轅

互通又漢書李廣傳爰臂蜎亦省作爰

步部

𨇖道中死人人所覆也从𠂔堇聲詩曰行有死人  
尙或殓之

殓今詩作殓案土部殓涂也是道殓應作殓殓借  
字也

𨇖敗也从𠂔畢聲商書曰彝倫攸𨇖

今書作斃字林亦作𨇖同

𠂔部

𠂔分解也从𠂔从刀



錢坫曰別从丹从刀俗以爲分辨解非分辨之別  
古作𠂔孝經說作𠂔今通用別

骨部

 骨中脂也从骨陸聲

漢郊祀志鸞鶴髡毒冒犀玉二十餘物漬種是髡  
正字漢以後俱作髓

𠂔部


 皮也从𠂔盧聲 籀文

禮記投壺五扶七扶九扶注鋪四指曰扶一指按  
寸春秋傳曰膚寸而合是膚與扶通

**𩚑** 𩚑齋也从肉齊聲

左氏傳後君噬齊作齊齋正字齊省字也



𦔻 祭福肉也从肉乍聲徐鼎臣曰今俗別作祚非  
周語能文則得天地天地所𦔻韋昭曰𦔻福也又  
文王質文故天𦔻之以天下是古者祚正作𦔻祚  
新附字

 𩚑 骨肉相似也从肉小聲

漢刑法志夫人宵天地之類應劭曰宵類也師古曰與肖同是肖通作宵

𠂔 振骨也从肉八聲

漢書禮樂志千童羅舞成八溢是胥正字溢借字  
侑新附字

體四肢也从肉只聲或从支

荀子君道篇如四肢之从心是肢肢同自專用肢  
而肢字廢矣

蟹醢也从肉疋聲

詩小雅君子樂胥箋胥有才知之名正義曰周禮  
每官各有胥徒胥一人則徒十人是胥以才知而  
爲十徒之長又有大胥小胥之官故知胥有才知  
之名易歸妹以須注亦云須有才知之稱天文有

須女屈原之妹名女須鄭志答洽剛云須才智之  
稱故屈原之妹以爲名胥須古今字也又詩以雅  
以南文王世子胥鼓南然則雅與胥通也故爾疋  
一作爾雅天之道地之理人之紀無不疏通故曰  
胥胥者雅也正也訓也訓其文正其名以合於雅  
乃得其敘事得其敘事之謂訓故詩大雅古文作  
大疋案劉表三爵曰伯雅中雅季雅一作盃方言  
曰盃杯也秦晉之間謂之雅郭注所謂伯盃也伯  
盃卽伯雅然則大雅卽大胥也詩曰籩豆有且侯  
氏宴胥太元曰不宴不雅禮樂廢也然則宴雅猶

宴胥胥又與雅通𣪠

刀部

𠂔 銳利也从刀炎聲

詩豔妻扇方處康成作剡妻云古今字

切 剡也从刀七聲

漢書外戚孝成趙皇后傳切皆銅沓黃金塗師古  
曰切門限也音干結反張平子西京賦設切厓隄  
李善注切與砌古字通是切正字砌新附字

𠂔 判也从刀度聲

左傳山有木工則度之郭璞爾雅注引則剡是剡

正字度通字

𠂔 裁也从刀从未未物成有滋味可裁斷一曰止也

詩制彼裳衣是古者製正作制

辨 判也从刀辨聲

三國志步騭傳何功而不成何事而不辦原本尙作辦是古辦正作辨从刀辦新附字

角部

𧢲 牛觸橫大木其角从角从大行聲詩曰設其楅

衡

周禮考工記衡四寸注衡古文橫假借字又左氏傳鬪廉衡陳其師于巴師之中以戰而北是衡橫通

觚

鄉飲酒之爵也一曰觴受三升者謂之觚从角瓜聲

觚爵也又觚棱或作觚棱又破觚本亦作觚是觚與觚通

解

判也从刀判牛角一曰解薦獸也

易有解卦又詩綢繆章見此邂逅釋文曰邂本亦作解又天命匪解不解於位是古邂懈俱作解懈

通字遡新附字也解廌或作獬豸廣韻字林俱作解廌廣雅作獬豸陸作獬豸

廌羌人所吹角居羣以驚馬也从角羣聲羣古文諄字

錢坫曰詩一之曰解發卽此字傳寫相沿誤以羣作咸耳

𧢲兕牛角可以飲者也从角黃聲其狀𧢲𧢲故謂之𧢲俗𧢲作觥

詩我姑酌彼兕觥箋觥罰爵也又兕觥其斛觥亦作觥按說文火部光明也古文作𧢲亦作𧢲又黃

部黃地之色也从芡芡亦聲芡古文光是黃从光  
得聲又左傳陳侯之弟黃公穀作光又書光被四  
表漢書作橫被又水經注北出西頭第一門名橫  
門如淳曰音光光黃同故光橫同橫觥亦同也

[illegible]